

PO FINI L’ VOLUME II DÈL DEUZYINME ANÊYE vola sakants rimâdjès sins grandivâdjès – ritrovés pa Matante Mèlîye – da Torine Uguète, l’ fêye bastaurdêye do grand Totor :

Bauyauds riwêtâdjès (*Veni, vidi, vixi*).

Adj’ bén viké paski mès sofrances ont ranci ?
Dji rote sins pont d’brès d’ aspouye,
Paski dès êfants dji n’ voléve nén d’ grêtouyes;
Minne sins fleûr dj’a sogne di n’nén transi.

Puski au printins, èwou tot ricrèche,
Dji n’ mi rafiyéve nén dès rilètchâdjès
Puski dji m’a tnu a iute dès bètchâdjès
Faut-i k’ mi n’ anoyance crèche ?

Piski l’ èspwêr è m’n’ âme a moru,
Piski l’ sinbon dès fleûrs èst sins fwace
Crapaude, vôrîz co ièsse à m’ place ?
Avou l’ keûr mwârt sins awè coru ?

Dj’a rade r’ noncî à fé m’ bouye,
Mi roye, li vla, mi djaube, l’ vola
Dja viké sins plêji èt dimérer raplapla
Co astampêye, dèdja dji m’ brouye.

Dja bouté djusse cki faut èt wêre sièrvu;
Sovént dj’a vèyu s’foute di mi
On s’ èwaréve ki dji dmère sins ami
L’ seûl k’avéve volu avéve tro bèvu.

È m’ gayole dji n’ voléve pont d’ rikète
Po nèlu dji n’ ma trin.né dsus m’ vinte;
Grigneuse, odêe, dji n’ mère sins plinte
Èt pwate li kèdje ki m’ dos mi skète.

Asteure, mi vla lès ouy sèrés, l’ cwâr nu;
Dji n’ toûne pus m’ tièsse si on m’ lome
Va-dj’, tro taurd, rinde anoyeu on ome
Ki n’s’a nén dispièrté.
Dji n’avéve nén dwarmu.

Djus m’ nonchalance, v’n’ alèz pu m’ voye
Rèsponde au mwêvolant ki m’ racûze.
Lès diès s’djokenut di m’mète dès bûzes
Lèyîz-m’ fé mès pakèts èt pèter èvoye.

L’ mantia do maisse-rwè.

Vos k’ l’ ovrâdje rafîye,
Vos k’avèz tant l’ pèpîye
Po l’ sinbon tchèyu do cîr,
Ki cauzu djuska dècimbe
Ranchèz èto dzo lès pîres
Po z’ î rascoude l’ suk sins timbe.

Vos lès tètaudes di rôzêye,
Ki sèwèz pa rilêyes
Lès cruwauds dès bouchnisses,
Ossi bén k’ pa boyêyes lès rôzes,
Vos lès bouteuses sins pôze
Kitèz don c’ mantia ki atrisse.

Brokèz dsus lès omes, vayantes !
Vos lès todi fwârt ardantes,
Vos lès ovreuses, lès pus fîres,
Ailes d’ aur, lumères di feû,
Aflachèz vos dsus, fèyèz lî peû.
Dès parèy à li, gn’a nén pîre.

“Diâle ! Nos vla lès wèspes !
Dsos l’s-ombrâdjès come dsus lès rèspes,
Nosse maujone, vèyoze-l’ au fond ?
A l’ pikète do djoû on s’ èvole,
Po têter tot, à l’ vinvole,
Come po lès lèbes da Platon.”

“C’ki soûrd dèl dagne î rmuche.
Va rcwêri Tibêre ddrî s’ n’ uch
Èt l’ Châle Noûf dsus s’ plantchî.
Va ! dsus t’rodje faut-i k’on stitche
Lès wèspes d’ Imète pa spritches
Di nwarès nûlêyes è ratchichis ?”

Trawèz-l’ tèrtotes èchonne,
Onte au Peûpe ki tronne,
Aveulèz l’ fèl trompeû,
Fyoze l’ tchaire dins l’ angoche
Èt l’ fé tchèssî paus moxhes
Puski lès omes è n’ont peû !
(Tot tèchant on Djèrsè, è 1853, “*Lès Punissions*”)

Djusse ène statistike : È 22 mwès, RABULÈTS vos a doné di pus di 350 pâdjès (iène tos lès deûs djoûs !) èt ène sakwè come 574 imaudjes (èt lès pâdjès di “bédé” i sont contêyes ètîres !!)

On avéve sayî d’ continuer à tot comachî... èt asteûre kwè alanne fé ?